

Neki ljudi ne mogu živjeti bez podrške. Da li ikada razmišljaš o njima?

Koalicija marginaliziranih grupa „KOMA“ okuplja pojedince, nevladine organizacije, društveno-odgovorne firme i socijalna preduzeća u misiji rješavanja prioriternih problema u sektoru ljudskih prava marginaliziranih grupa. KOMA trenutno broji 64 članice iz cijele BiH i cilj joj je da putem javnog zagovaranja direktno utiče na proces donošenja javnih politika u ovoj oblasti.

„Živjela sam kao i svi ostali ljudi i nisam mislila da će se nešto promijeniti sve dok nije rođena moja kćerka Mia. Kada je napunila 5 godina saopćili su nam da ima dijagnozu: visokofunkcionalni autizam. I dok sam se sama borila s tim problemom, morala sam se istovremeno suočavati sa raznim predrasudama. Teško je opisati osjećaj nemoći i boli koje takve situacije mogu proizrokovati u srcu majke koja bi učinila sve za dijete, a ne može. Ine mogu da zamislim kako svijet izgleda u njenim očima: kroz šta sve ona prolazi, jer ne zna da se izrazi, ne zna da kaže šta je i zašto je to tako. Često se hrabrim da nisam na margini. Ali, onda pogledam svoju neposrednu okolinu. Moja Mia nema nijednu prijateljicu koja se druži sa njom. Ima svoju malu raju u vrtiću „Sunce“ u Mjedenici, ali kući joj niko ne dolazi. Na rođendane je ne pozivaju, na njene rođendane dođe malo djece. Patim zbog toga, jer

iznad svega želim da bude prihvaćena u društvu. Iako je jako napredovala kroz rad i bihevijoralnu terapiju u EDUS-u, većina u njoj vidi njenu dijagnozu. Kao da ih je strah da bi ona mogla povrijediti njihovu djecu. A ne znaju da su djeca sa autizmom djeca koja su najslabija anđeli, djeca koja ne znaju za zlo, djeca koja ne lažu... Najljepša djeca.“ piše Irma Čatović. Irmina priča predstavlja samo dio svjedočenja koji ilustruju svakodnevnu borbu ljudi koji se suočavaju sa raznim situacijama ili bolestima zbog kojih im je potrebna tuđa podrška. Evidentno je da je institucionalna podrška dugoročnom rješavanju ovakvih problema nedovoljna, a i društvo u cjelini nije pretjerano voljno ili organizirano da osmisli sistem u kojem bi trajno zbrinuli ljude s poteškoćama i uključili ih u društvo. Spomenuti problemi, ali i društvene predrasude i odbijanje da se prihvati drugo i drugačije

i dalje predstavlja najveću prepreku zbrinjavanju ovih ljudi u zajednicu i razlog je njihovog ostajanja na marginama društva. Stoga Koalicija KOMA pod motom kampanje: „Zar misliš da si daleko od margine i da ćeš tamo ostati cijeli život? - Neki ljudi ne mogu živjeti bez podrške. Da li ikada razmišljaš o njima?“ apeluje na bosanskohercegovačke građane i društvo u cjelini da, prije svega, odbace predrasude (jer se svako može naći u situaciji da zbog bolesti ili problema ostane na margini) i ponude rješenja za život u zajednici za sve one kojima je potrebna tuđa podrška. Istovremeno, ova kampanja zagovara rješenja za uspostavljanje minimuma socijalne sigurnosti i jednakah mogućnosti putem usvajanja mjera na nivou entiteta u BiH, kao što su izmjene i dopune postojećih ili usvajanje novih resornih zakona o socijalnoj zaštiti ili drugih akata koji reguliraju ovu oblast.

DNEVNI LIST, 21.09.2015